

每週經課朗誦經文(巴克禮台語漢字)014/06/15

共同經課 - 1

創世記一章一節~二章四 a 節

1 源起頭，上帝創造天及地。2 地是空空混沌，深淵的面上黑暗；上帝的神運動佇水面。3 上帝講：「著有光」，就有光。4 上帝看光是好，上帝將光暗分開。5 上帝叫彼個光做「日」，叫暗做「暝」。有下昏，有早起，是頭一日。6 上帝講：「諸個水的中間著有穹蒼，將水及水分開。」7 上帝就造穹蒼，來分開穹蒼下的水，及穹蒼頂的水。就有按呢。8 上帝叫穹蒼做「天」。有下昏，有早起，是第二日。9 上帝講：「天下諸個水著聚集到一所在，乾地著出現。」就有按呢。10 上帝叫乾地做「地」，叫聚集的水做「海」。上帝看伊是好。11 上帝講：「地著發草以及結子的菜蔬，及照類生果子的樹，彼內面有伊的子佇地上。」就有按呢。12 地就發草及照類結子的菜蔬，及照類生果子的樹；內面有伊的子。上帝看伊是好。13 有下昏，有早起，是第三日。14 上帝講：「天裡的穹蒼著有發光的體，來分別日暝，亦通做兆頭，四季、日、年，15 亦互in做光體佇天的穹蒼，照光佇地上。」就有按呢。16 上帝就造大的光體二個，大的光體來管日時，細的光體來管暝時，也造星辰。17 上帝下in佇天裡的穹蒼，互in照光佇地裡，18 也欲管有日暝，分別光暗。上帝看伊是好。19 有下昏，有早起，是第四日。20 上帝講：「水著生澁多多有活命的動物；鳥飛佇地的頂面，天裡的穹蒼。」21 上帝就創造海裡的大魚以及水所生多多有活命的動物，各照伊的類；閣創造逐樣的飛鳥，照伊的類。上帝看伊是好。22 上帝賜福in，講：「著生澁加添真多，充滿佇海裡的水；也互鳥隻生澁多多佇地裡。」23 有下昏，有早起，是第五日。24 上帝講：「地著生有活命的動物，照伊的類；精牲、蟲道(thoā)、地上的走獸，照伊的類。」就有按呢。25 上帝就造地上的走獸，照伊的類；精牲，照伊的類；地上一切的蟲道(thoā)，照伊的類。上帝看伊是好。26 上帝講：「咱著造人親像咱的像、照咱的款，互in管理海裡的魚、天裡的鳥、及精牲，及全地，以及地上啲趣的蟲道(thoā)。」27 上帝就創造人親像伊家己的像，照上帝的像創造伊，創造in男者女者。28 上帝賜福in，上帝閣對in講：「著生澁真多，充滿佇地上，來卡贏伊，也著治理海裡的魚、天裡的鳥，及地上一切所振動的活物。」29 上帝講：「我有互恁遍地上一切結子的菜蔬閣一切的樹，其中有結子的樹的果子攏互恁做食物。30 論到地上一切的走獸天中一切的鳥，及地上一切會振動有活命的物，我將一切青草互in做食物。」就有按呢。31 上帝看伊一切所造的，看啊！真好。有下昏，有早起，是第六日。1 天地及伊一切所有的已經做完。2 佇第七日，上帝完伊所造的工，就佇第七日息伊一切所造的工。3 上帝賜福佇第七日，定做聖日；因為佇此日，上帝停伊一切創造的工，就安息。4 天地創造的來歷，佇耶和華上帝造地及天的日，

共同經課 - 2

詩篇八篇

1 [大衛的詩，交互樂官。用迦特的樂器。] 耶和華——阮的主啊，你的名佇全地到即高大！你將你的榮光排設佇天裡。2 你因為你的對敵的緣故，對嬰仔及食奶者的嘴，建立能力，欲互對敵及報冤者靜靜。3 我看你的天你的手所造的，及你所排列的月及星，4 世間人是甚麼，你數念伊？人的子是甚麼，你眷顧伊？5 你互伊比天使厘仔卡輪，閣賞賜伊榮光尊貴做冕旒。6 你設立伊管理你的手所造的，下萬物佇伊的腳下，7 就是一切的羊及牛，山野的走獸，8 天中的鳥、海內的魚，及見若經過海裡的路的，攏下佇伊的腳下。9 耶和華——阮的主啊，你的名佇全地到許高大！

共同經課 - 3

哥林多後書十三章十一節~十三節

11 兄弟啊，結尾來講：著歡喜。著完全；著受安慰；著同心；著和睦。就賞賜仁愛及平安的上帝欲及恁佇啲。12 著用聖的相侵，來相請安。13 諸個聖徒攏請安恁。

共同經課 - 4

馬太福音二十八章十六節~二十節

16 若是十一個學生去加利利，到耶穌所曾給in定著的山。17 看見伊就拜伊，總是有的僥疑。18 耶穌近倚來對in講話，講：「天頂地下的權已經攏總互我。19 所以，恁著去招萬百姓來做學生，給in行洗禮，互in歸佇父、子、聖神的名。20 見若我所有命令恁的，著教示in守，閣我日日及恁佇啲，到世間的路尾。」。